

Otro aporte na un Aruba Nobo di Gabinete Mike Eman II ta inicia



Dia 28 di mei inicio construccion di hospital nobo

DIA 16 di april e contract entre SOGA y OHL Arellano Construction pa loke ta renobacion y ampliacion di dr. Horacio Oduber Hospital a tuma luga den Renaissance Convention Center. Awor ta bay over na e siguiente paso cu ta e groundbreaking cu ta tuma lugar dia 28 di e luna aki. Di parti di gobierno Ministernan Eman, Schwengle y Sevinger tambe a pone nan firma bou di e documento importante aki dunando asina luz berde pa ehecucion di e proyecto mas grandi y innovativo den su sorto cu a yega di tuma luga na Aruba. Ta bon

pa menciona cu e documento cu a wordo firma luna pasa ta un asina yama GMP contract. Gross Maximum Price ta encera cu e prijs no por subi di loke a keda acorda.

Diaranson 28 di mei ceremonia di groundbreaking di e enorme proyecto aki ta tuma luga. Un trabou cu ta bay tin un duracion di 4 aña y mey. E renobacion ta encera fase IA, cu ta e toren nobo na unda e camanan ta bay ta, fase IB cu ta e Medical Office Building, na unda e specialistanan ta bay tin nan consultorio y fase II ta renobacion di e parti existente

di hospital. Ta bay tin varios cambio grandi, entre otro e departamento di SpoedEisende Hulp ta bay haya dos entrada pa privacidad di e pashent cu awor no por wordo garantisá tur ora. Un otro cambio positivo ta cu pashentnan no ta bay drumi cu hopi hende mas den un camber manera antes, pero e cambernan ta acomoda solamente dos pashent. E trabounan di renobacion y ampliacion ta trece cu nan tambe un trabou grandi di logistica. Aki a envolvi tur partido den hospital pa por a yega na e puntonan esencial pa tur cos sigui cana den e miho forma



posibel sin cu e pashent of empleadonan ta sinti molester di e trabounan andando.

Un exigencia grandi di parti di gobierno tabata pa OHL Arellano, e contratista principal haci uzo di subcontratistanan local. Asina companianan manera BOHAMA NV, Croon NV, Albo Aruba N.V., CHS Technical Contracting y otronan ta parti di e trabounan grandi cu ta bay wordo haci den ehecucion di e proyecto aki. Di biaha despues

di e groundbreaking a trabounan ta cuminsa.

Pa Aruba e proyecto aki ta encera un cambio grandi y positivo. Un cambio cu tabata necesario, pasobra cu hospital ya no ta cumpli cu e exigencianan di e tempo aki mas. Mundo medico, ciencia y tecnologianan moderno no ta para keto y nos no por keda atras ni tampoco wak bek. Ta p'esey cu e desaroyonan aki ta di aplaudi. E ta bon pa tur cu ta biba riba e pida baranca aki. E hospital ta di nos tur.